

進賢縣志卷三

建置

周禮考工一冊載宮室城隅以及野涂溝洫之制纖悉畢
詳誠以體國經野王政之首務也古之人入其境而橋梁
治道路修且以此識賢吏焉孰謂一邑而顧可忽乎哉進
賢之署建于宋城建於明由此而以待賓旅以衛民生舉
凡候館廩藏陂澤兵防津梁郵遞迄於今規制大備矣顧
遷徙廢置代匪一端損之益之與時宜之是在良有司之
留意也志建置

建置

城池

官署

公所

進賢縣志

卷三

建置

城池

縣舊無城明正德五年江西盜起署知府同知汪穎建築城議
知縣姚永順奉議興工旋以疾寢八年知縣王紀始創築土城
為門六門各有樓省志作知縣朱英加砌以甃十二年知縣劉源清以宸濠

變議加磚石未果嘉靖三十七年南贛盜發樞臣奏請郡縣無
城者尅期完築時署篆同知袁株奉檄經始三十八年知縣程
光甸克勤厥務更築址以石覆以石中壘以磚周一千三十丈
有奇高一丈七尺厚一丈門併樓仍六東曰啟和西曰迎恩南
曰來撫北曰拱極東南曰文明西南曰田洽隨以水西街居民
衆自來撫出入不便復闢水西門制視諸門稍隘東門城址逼

民居邑人楊重俊捐基橫四尺直十餘丈廣之城上高鋪二十四所費帑金二萬餘萬歷三十六年大水城圯一百四十丈知縣周光祖重築四十五年知縣沈景初改東南文明門於學宮前建甲秀樓

國朝康熙三年知縣聶當世捐修聶志乾隆八年知縣姚夢麟

奉檄重修周一千七十丈垛口一千一百七十七個門樓七座

估工一萬一千二百餘兩羅志道光二年日久傾圯一百零一

段計四百七十七丈一尺知縣朱楣詳請勸諭捐修咸豐

三年知縣潘尊賢勸捐修理周圍完固

嘉靖戊午萬浩築城記吾邑舊惟土城創自正德初今頽塌

進賢縣志

卷三

城池

二

殆盡嘗議興建每沮於財力弗逮嘉靖戊午南贛寇發兵部

疏請郡縣宜尅期築城巡撫吉揚何公奉詔惟謹遍勅有司

毋怠歲己未郡守韓公懷南謂進賢密邇會省爲東南巨障

白諸兩道轉聞於巡按東泉鄭公議與何公克協夏初太參

敬所王公僉憲少南何公臨縣經始署縣事同知袁君株受

成之餘悉心綜理用質於叔父太宰叔父曰凡民艱於議始

率之則趨吾其首事焉遂領城樓一所垣二百餘丈司寇傅

公司馬張公少卿汪公太守楊公相與繼之庚申春邑令程

君光甸勵精初政喟然曰財資於衆出者不覺其費力分於

多任者不見其勞前議官糧無差石取一錢不爲虐也在城

丁一錢二鄉則半之約而公矣但領役必於上戶抑孰若區別三則因力受事之尤均乎暨縣丞呂鳳翔主簿蔡棠典史郭黼僉覈上戶不過一丈中止一丈下者量爲之助於是譁然者翕然事事矣入秋王公總臬太叅紀山曹公代之躬詣城所犒賞有差民故謹奮不加衆而力愈倍矣公以一邑巨工速成於一時恐弗堪也復偕何公請諸兩院出公帑四千餘金方伯白石蔡公北川陸公如議發給是既有濟於目前其以後加派因之而亦減矣惟時浮峯張公撫命新膺古松段公按節適至後先一體務求底績故於冬季厥工告成城週一千零三十丈厚一丈高視厚加七尺門樓六所窩鋪二

十四所橋二載城於上名青龍者亦重建焉共費白金二萬二千餘兩越程侯徵記於叔父叔父命曰城工初末心力汝勤宜有言焉浩受命拜曰天下之事未見其端自我舉之恒患於不從逮至已然又恨於不及卽連年閩廣流寇凡受禍之邑俱屬無城彼雖欲城其何能乃吾茲得以致其工力能未失可乘之天時也邑鄰撫建警息每聞而城功旣成永無駭怖上下俊傑同德共濟其人事之相值者又如此哉昨秋賊衆已渡雲山大中丞柏泉胡公入境之初駐斯經略彼西望畏沮遂爾東潰噫城之不可已也益較然矣雖然險設矣議所以守之功成矣議所以保之立法貴豫是尤有望於當

事之賢者

萬曆四十五年李光元改修文明門記先師孔子廟眎王者前有觀闕禮也國中則外屏帶城者則門表焉進賢城繞文廟前顧門右曰文明文明者當塗之象也而右之門名悖而心胷也將以嚮明而答四方何可以不廣示也蓋議徙門者久之萬曆四十有五年會令沈公敦獎文學亟用者俊之請毅然以爲已任新門遂成高廣爲七門冠門臺麗譙再重岌業炫耀旅揖諸峯三臺明而鳳凰翼門外治馳道而右溝植亦爲環涂第一門內爲堤唐捷之泮如弦涂如砥洞川隰於

一軌唐之泮立巨材爲坊曰大成諭斯志也必博遠光偉之儒皆於是乎出公之嘉意不與天壤俱無窮哉君子曰此三才之一會也迹余所睹記前後令之有風愛者於學宮蓋數數然矣當其時徙門之議持久不決遂安毛公未門而進志基命也厥搆取厯厯而已仁和黃公新明倫堂暨名宦鄉賢祠貞教本眎物也規恢非所亟焉青浦錢公建閣於明倫堂之左曰尊經一統記也堂廉故瞰廟極閣與今門譙相睇然而門譙者廟之觀闕而學士之面目心胸也觀止矣其議不啻久其成也忽然斯非時至於天法呈於地道待具人之明效也哉故曰三才之一會也是役也本事以公俸其仂以鍰

輸作以杖二十以下工始於二月四日竣於九月九日民無
知焉公名景初浙江餘姚人癸丑進士由南康調劇至屬董
事者學博士吳君維翰而徐君宗賀龔君大賓並相成成之
日於公調至爲浹月於公三年秩滿上計最爲前一月也
萬曆四十五年熊明遇改修文明門記文明門舊建於學宮
東偏道弁而隅不當山水朝宗歲丙辰沈侯日倪從薦紳先
生父老子弟之請直學宮改闢焉高門且開而明堂若冠泮
水若帶三臺若拱九曲若織耕之趨原田者每每也旅之出
涂巷者便便也斯士譽髦之朝夕賢宇者訢訢也美哉文明
基之矣君子曰是邑必興小人曰新與舊布武不百焉仍舊

貫如之何熊子曰是未覩於風氣之大全人文之關紐也蓋
吾邑形勝麻榭作鎮揭以高宗山之南而蜿蜒者雲霞蔚蕩
水之東而蜿蜒者蛟龍瀆薄而皆大會於邑一鍾美政事堂
臨岡面京從山秀也則水合其後一鍾美學宮坐收東汝之
注則山水俱合其前半壁中央曲江映帶自然之形理也邑
先是未有城學宮所對如天繪於時臺座鼎盛飄組雲臺者
肩摩後卽第者項背不無微遜前美且城之七門皆不當朝
宗年來市廛鮮蓋藏邑屋鮮甲宅而闔閭之煨於闕伯者十
三田圩之圯於實沈者十三今日之文明寧直學宮嘉賴乃
通邑之正門也舊建之址其涂弁其位隅其山水反走改作

之美獨君子愛乎哉蓋偏據而視陋不如審曲以宅中規小而乖方不如面執而經大天之道也太乙當紫宮之戶也端門正三光之庭也藩國匡天市之樓也斯其燦然者矣是故星辰爲天文而不明於雲霧山川爲地文而不明於藜莽精粹爲人文而不明於蔽陷斯門也君子所履小人所視小人難以慮始而易與樂成彼接足而朝夕近市者披三條經九軌亦孰不喁喁欣富教之有象乎所爲可使由而不可使知者也乃君子之至於斯觀重門之洞開瞻宮墻之儼翼於以講論乎六藝稽合乎異同不啻披雲霧而覩天廓藜莽而矚地精粹之所鬱發詎止於灘合湖明之兆而已耶若夫冠裳

聚止珂玉交鳴柱笏登高當筵歌舞瞰暘谷而熊嵐香嶺層雲盪胸睨元圃而白湖漸峯飛霞照席洞陽之藪龍岐之澤又魚龍之所吟嘯而日月之所沐浴也當斯時會且吞雲夢八九而直凌霄漢之上矣其爲文明豈不大哉門之制聚土爲闈環石爲穹構木爲閣埏埴爲睥睨舉以法直學宮榜曰甲秀樓糜可六白金皆侯斥金矢不入民固由之而不知者也

康熙乙巳熊人霖修城記天官北宮真武其宿南斗爲廟危爲蓋屋營室爲清廟璧爲文府皆主營建版築之象而斗分野江湖乃進賢馱以南州分野上應天光其星在龍角平道

間青青有章蓋水火之所和演陰陽之所際會地也而得其
天焉邑自唐稱鍾陵鎮而析疆伊馘肇宋崇寧間粵有明正
統初龍巖張侯冲來涖是邑相土協謀草創官司廬井正德
間泰州王侯紀稍崇飭雉堞樓櫓爲守望資迄嘉靖南贛寇
發大君有命撫臣行節增築於是太湖程侯光甸益廓之崇
正間潛山王侯揚基更增其三版今垂四十年有基勿壞城
之庇吾進邀天之福未嘗有復隍之虞矣康熙癸卯監利二
瞻聶侯以名進士宰是邑後繭絲先保障劍及垣屨及城見
雉之明者或湮亢者或俯且城上不得並驅倘然介馬而馳
之爭取螯弧先登奚由控縱聚吏士咨詢之曰茲邑其肇有
寧宇何敢以興雖然處泰之上六而有惕然復隍之虞居安
思危又奚敢恃陋且邑爲吳楚閩越之衝地左軍山右洞庭
北宮亭險可恃也則亦人所必爭進邑全省庇也可弗周於
敝矣修築經費弗貲使狃目前而弗爲圖是日中不彗也抑
責之旦夕急就焉是極重之賦不能蠲而土功箕斂益困之
毋乃反裘負薪之譏乎侯涖治三載日思所以庇吾民也所
見無非城者於是節衣縮食計薪俸羨積若干計金矢夙儲
若干月計不足歲計有餘爰於乙巳之春肇修焉范土而陶
縮版而築騎危城而蓋守望之屋拓城址而裨之甃石焉廣

度以軌役力而償之不病農飭材而購之不病工湮者以明
府者以亢城上可以旋駟清瑯夫之餽餼擊柝者營室建而
畢工東壁中而考成侯建中權之鼓耀旌旗以震疊江湖之
輕心者惟我進之士若民則知有城之庇而不知有役也聶
侯直稱厥職哉維時各上臺明威久樹風聲淵思夙圖桑土
故聶侯得受成而上其功云國功曰功民功曰庸功久曰閱
誼當勒之貞石以志勿翦至司諭廬陵曾君翰邑丞贊皇安
君克純典史馮錫祿巡司茅汝明沈文衡邵可成皆効力鑿
鼓例得並書侯名當世順治戊戌進士銘曰爍進賢兮天光
臨官兮邑兮庇吾民鍾在陵殷殷兮鼓在墉勿亟蛟鼉惕伏

兮江湖謐泰無虞兮師貞吉歌蔽芾兮罔攸射

乾隆癸亥羅荃修城記進賢縣城週迴一千七十丈爲雉堞
者一千七百七十有奇爲城門樓者七初僅土城明嘉靖始
甃以磚至萬曆三十六年水城傾一百餘丈周令光祖重修
已非金墉之固矣鼎革時兵燹疊更傾頽實甚

國朝康熙三年聶侯當世加增堞口修葺城樓而入九十年
來土墮磚糜城身日敝特樓堞蕩然且千蹊萬徑無復關
闔乾隆八年癸亥梁南姚侯來涖吾邑顧而憂之亟請上憲
大加興修旣報可且委員度土工焉於是估計給帑一萬零
四百兩刻期興工侯曰不一勞不可以永逸爰鑿石於山陶

塤於野購墾於鄰邑募力於無業之民盡撤其舊而更新之
引溝築基塤以堅礪城東水門建丹鳳青龍二橋爲城之趺
自趾至腰以石上身以磚表裏畫然毫髮無差中實三灰七
土築之登登削屢馮馮計高一丈加堞五尺堞用方石覆其
頂如笠如屋奕世不叱城之闕捲甃建巍樓者七疊飛雲表
可以察禳祥可以嚴守望可以壯觀瞻大體得而衆善畢臻
噫盛矣惟侯廉以克已勤以奉公撤蓋屏輿日行塵坌中與
匠作均勞苦口講指畫有如一家面黑膚焦不印自恤宜乎
人心鼓舞趨事恐後耳是役也工始於甲子季春竣於乙丑
之臘石以方計六萬八千五百有奇磚以枚計七十萬九千

九百有奇灰以權計二十六萬七百有奇他如木竹瓦鐵木
易更僕費鏹一萬一千八十六兩零乃功始告成碑誌未立
而侯以計典去官矣荃受知於侯爲門下士又目覩締造之
艱何敢坐聽淹沒不揣固陋因作斯記且討工實贖諸建置
志末俾踵事者得所折衷焉侯諱夢麟號瑞徵雲南臨安府
蒙自縣癸卯正科舉人

附城河發源香爐嶺仙壇峯流從城東南新橋入城過大石橋

又折而北東從縣左青龍橋出繞城北注青嵐湖

縣册

鍾陵故城在進賢縣西北漢南昌縣之東境

府志

今有鍾陵市在縣東南昌縣界又有鍾陵鄉故城蓋在今二縣

官署

縣署枕壇石山宋崇寧三年創建建炎間燬於兵紹興二十六年縣令杜易重建乾道六年縣令張嘉謀建廳堂門廡元至正乙亥復燬於兵丙子尉劉勇重建丁亥縣尹周天祥大德乙巳達魯花赤波羅嘗增葺之至元中縣尹唐玉成建正廳元統中縣尹李世能建後廳達魯花赤夾谷八兒思不花創譙樓至正庚寅達魯花赤袁州海牙益新其制未幾俱燬丙申縣尹傅箕又新之明洪武中知縣李思中重修永樂中知縣余曜治縣有聲僉憲黃公翰書清正堂旌之天順間吳聘君與弼題其前楣

進賢縣志

卷三

官署

十

曰清獻之邦正統間知縣張冲復修正德丁卯知縣李思曾以堂址卑乃撤後堂爲廳事五楹顏其堂曰親民堂嘉靖乙未知縣蘇志臯重葺萬曆癸卯知縣黃汝亨改顏爲保慈堂

國朝康熙十年知縣聶當世建廳一重額曰保赤堂凡川堂東庫房西册房東西二廊儀門鼓樓俱新葺改觀焉

聶志

乾隆三十年知縣孫鐸增修之并鑿壇石山頭建宅門川堂二堂西通舊廡

羅志

邑人包衍清正堂記莆田余侯之令進賢馳德政聲僉憲松江黃公翰至邑書清正顏官署之堂以旌其操勸也孟氏曰君子與人爲善僉憲公有焉正己以正人侯其有焉其蒞政

也不察爲智不煦爲仁不靡而怠不刻而苛懷儉邪者咸結
舌舞巧智者莫厠足行苞苴者讒佞者弗敢爲先容修黌宮
成文昌樓爲教化之地崇禮師儒誘掖俊彥善作興焉廨署
館傳壇墀祠宇戮力完治至於已之私室無一增飾安固陋
而已處察案和而不同待羣吏權由已出治獄訟以善諭弗
文致改而止有頑弗率德糾羣肆譏者竄殛無遺類民風一
革及遇水旱若已傷必竭誠禱禱饑饉則勸率賑貸民德之
稅賦積兌董之有方國用所需刻期畢備藩郡才之夫水固
自清也泥滯之流始濁表固自正也拜屈之影始枉書曰清
明在躬語曰政者正也侯有修己正人之道故僉憲公名侯
進賢縣志

卷三

官署

十一

之堂曰清正也史記豐稷之清如水楊震之四知皆特書表
之侯之衆善兼美一介獨持維清則正維正益清難矣哉

邑人萬鏗親民堂記凡官府之制以廳事爲重蓋臨下出政
於此宅中以運四隅也厥惟高明乃宜吾邑廳事建立已久
厥址庳夷與旁廨等而廳後爲退居地勢穹然顧相陵壓夫
所重而乖於制莫之或省也宏治壬戌冬茂名李公學曾以
進士來宰吾邑視事之初卽圖改作而物力未裕規畫以需
乙丑秋乃撤退居之故宇因高爽之成基畚楛稍施方平若
一卽其所作廳事焉凡五楹其廣六尋有半深視廣三之二
而差縮焉崇視深二之一而加贏焉前則厥其庭以納陽光

後則壁其中楹以供便坐而舊廳則仍存之以爲羣下候直之所由庭而升廳事高計之爲尺者三由舊廳而升於庭尺如之加寸者五厯以階幾以石役不踰時聳然改觀公日率屬臨止步位峻整體統尊嚴規模崇顯耳目發舒會於心達於其政所得者多矣閱三載正德戊辰公被召爲刑科給事先是宰邑者多敗於官卽有轉遷罔克如意堪輿家謂廳事庫壓所致及是而公始膺顯擢抑地靈之應有所助歟此固不必深論要之脫卑近而宅高明君子爲政自爾也後三十年嘉靖乙未乃今蘇侯蒞任之歲顧瞻茲廳久而寢做恐前規之就廢也爰加整葺被飾一新旣而曰嗣其事不著其始

享其居不知其人可乎乃追李公作廳始末屢託於予予昔備員邑庠荷公之遇甚厚每欲祠公於名宦而未果也瞻茲遺績固樂書之況重以侯之請耶侯名志臯固安人壬辰進士更賢治劇來自瀏陽舉廢修墜此一端耳乃廳甫修而臺諫之徵適至亦其會也并書之

邑人饒宇棻保赤堂記鍾陵據會省之東取道浙閩者類信宿然後去故治象盛衰純疵常爲四方觀瞻取法治故有堂浸燬於兵踵事者乃析民居新之柱礎門屏取具而已非能高明光大以壯望邑之觀也玉沙聶侯以名甲第來令吾邑凡事之有待於新者無不畢新新學宮矣又飭城垣新倉

廢矣又建伍相國廟修羅溪矣又修郊圻之橋梁進固瘠土
俟休養生息舉公事之宜新宜飭者朝發而夕告成事乃顧
瞻茲堂仍猶舊貫非所以作民敬而告以居官之未可假易
也於是以某年某月庀材命工不旋踵而堂成取材自公民
不知役然後知侯之所以安位者勤愛民者仁而報

君者大也蓋上所示於下者莫如體而下所貢於上者莫如
情若夫其體不崇其志不肅其情亦必不出也夫上所以治
下與下所以受治者率以爲分耳以爲分則惟我所命尊嚴
則尊嚴之苟簡而亦無不尊嚴之亦安所見民違順於其間
哉而黠者則有以窺之矣反覆隱藏卽嚴刑峻罰而情不出

蓋不情生於不敬不敬生於不肅居卑隘之堂而希隆盛之
理上所求於下者略下所報於上者微治固然也侯精明博
大事不可已必求安好而後止類如斯堂然則斯堂也以爲
大令布德行惠之所而卽億萬姓望恩希澤喁喁待命之所
以爲大令曲直得情之所而卽窮簷婦子顛連觸目之所登
斯堂者安得不瞿然深思惕然遠覽哉侯仁政多端美不勝
書於斯堂顏之曰保赤又署之曰居敬是可以報

君是可以安位侯之意於是倜倜乎其遠且大矣侯撫吾邑
者十稔且夕內召余體侯之意備書之以告後之官斯堂者
聶侯諱當世號二瞻湖廣監利縣人順治戊戌進士

知縣廨在堂西北共三進翼以左右廂

龍亭庫在廳事左

戒石亭甬路中

上地祠儀門內左偏

吏舍廳堦左右東承發號吏戶禮房西兵刑工房以上咸豐六年俱被賊燬

監獄儀門內右偏康熙間改設儀門外右偏

鼓樓儀門外

幕廳廳事左今廢

軍器庫架閣庫俱在廳事右今廢

賓館儀門外左偏今廢

旌善亭申明亭俱洪武中立縣署西知縣張裕改列縣門東西

進賢縣志

卷三

官署

古

後知縣梁璧又立亭各鄉都共四十所今俱廢 以上舊志

按舊志載縣署有慶蓮堂清陰樓景魏亭望雲亭俱宋乾

道間縣令張嘉謀所建安樂堂元至正間達魯花赤袁州

海牙所建壽萱堂洪武間知縣徐成美顏於後堂復易為

自如軒嘉靖間知縣曾挺改顏曰寓諫軒萬曆間知縣黃

汝亨改顏曰嘯軒嘉禾堂則嘉靖間知縣蘇志臯顏於後

廳觀物亭知縣趙理建喜雨堂則正德間知縣姚永楨創

于廳北桂花亭則黃 汝建端蓮亭天啟間知縣梁應材建

今俱廢

邑人萬鏗寓諫軒記縣治廳事之後旁出達右直令廨之前

餘地二三丈許有軒翼然於其間廣不及尋者寸深不及廣者尺高視深加三其一焉軒故名自如如廳後之左地迂且僻曠漠之居日漸荒圯邑侯筆山曾先生旣蒞政五閱月念退食之靡居而茲軒之間置也乃撤而移之材用舊而當嬴工未旬而告訖亦誠簡樸矣哉一日太守常濱何君過予言曰筆山之軒成矣方擬所以扁之予曰云何常濱三數舉焉而予未之應也常濱曰君意竟如何予曰筆山非諫官乎而屈致吾邑非緣直諫乎則茲軒也乃其寄寓焉耳扁以寓諫不亦可乎旣而筆山聞之曰扁出於治齋則可吾固不可常濱復以語予予爲書其扁而復申其義曰人生天地間皆寓也順逆得失之境倚伏於後先而推遷於左右者寧有常邪衆人交蔽故不勝其避就之私惟安於所值而無所容心焉此君子處寓之道也筆山其見之素矣今也卽軒之所在而身寓焉卽身之所寓而心安焉時乎寓也或整襟而危坐或隱几而深思或啟窓而舒眸或巡簷而散步或對客於此議論而咨詢當斯時也瘡痍之念不有軫切於閭閻者乎芹曝之忱不有馳戀於魏闕者乎朱墨之斟裁不有默運於案牘者乎仰前修之芳躅俯來世之嚴評不有奮然而興惕然而省者乎筆山久歷兩垣多所建白未暇悉陳頃因大駕南巡三上封事尤爲天下之所傳誦予嘗得其疏草而竊評之忠

誠懇至有折檻引裾之風詞旨明婉有納約自牖之義識宏
達而事皆可行有濟川作霖之用時倥偬而文如宿構有倚
馬揮毫之能直道難容高才見忌炎荒之謫固弗免矣雖然
天生英傑豈無意乎將降大任此乃爲之地耳蓋動忍之益
則德日崇焉盤錯之經則業日廣焉閱歷之助鬱遏之鳴則
文日昌焉古所謂立德立功立言將在是矣筆山持此三者
足以不朽矣然則茲軒之所寓祇諫耶亦有進於諫者耶果
寓邪抑有久於寓者耶寓也者暫時之迹也久也者不朽之
名也而軒也者暫之所卽而久之所基也吾又聞昔賢所歷
之處一草一木一椽一瓦人皆慕而傳之茲軒因筆山之寓
而傳播益遠則茲寓也實軒之幸也已而鏜也亦以狂慙忤
時久安放棄有懷耿耿藉此一鳴後之人或因其文而比數
之曰是氣味相似者庶托以不朽乎則斯記也又鏜之幸也
已

儒學署詳學校

縣丞署在縣堂東側宋乾道壬辰張挺新之元季兵燬

縣志

國朝乾隆四十二年縣丞王世鈞借廉新葺

府志

典史署舊在縣治南淳熙間尉黃汝嘉作三賢堂於廳西以祀

梅福魏徵士臧嘉猷卽今學基後改建縣治西南簿廳前

縣志

朝乾隆三十四年典史朱士任借廉修理

府志

今俱被賊燬

梅莊巡檢署在縣東北六十里雷家莊卽鄔子巡檢乾隆三十年改兼管潤陂巡檢移駐梅莊府志

潤陂巡檢司縣治東八十里明洪武初立 鄔子巡檢司縣治

東北一百二十里明洪武初改鄔子立寨 龍山巡檢司縣治

北百里明正統初立 花園巡檢司縣治東南四十里嘉靖末

年以平花園盜立聶志以上四巡司今俱廢裁

按縣舊有土坊巡司饒坊巡司明初裁聶志

主簿署縣署西側今廢聶志

鄔子驛在縣東北一百二十里巡司署右康熙三年裁聶志

按縣舊有澁塘驛菱塘驛羅溪驛土坊驛俱明初裁又邑內

進賢縣志

卷三

官署

七

戊戌補刻

原設馬驛亦廢基卽今城隍廟聶志

河泊所在鄔子口聶志今裁

城守營舊無署乾隆丁亥知縣孫鐸購城西何姓別業建見乾隆丙

戊遷武朝記今賊燬

陰陽學舊在城隍廟側知縣周光祖改建文節祠左

醫學舊在鼓樓前知縣周光祖改建文節祠右

僧會司在海智寺 道會司在崇真觀以上聶志今俱廢

按縣舊有監酒稅廳在邑治東酒務在邑東南稅果局舊在

霧嶺義井東正統十二年知縣張冲改于南昌道左旋撤聶志

公所

萬壽宮嘉慶十五年建在西壇康王廟右院牆舒英賢捐建

萬壽亭乾隆三十五年知縣李升庸建於海智寺後

羅志

考棚在縣泊東南其基地東至曲水書院西至齊姓屋南至港北至港係黃敬業黃金鐸黃梅黃聖奏黃孔箕勸族公捐嘉慶二十一年丙子廩生萬叔權建大門內旁屋兩間二門內小屋兩間東西坐號可容千餘人正堂一間旁房兩間東西倉兩間小屋兩間其後尚有餘址

新建進賢考棚記南昌府治之東偏百二十里有縣曰進賢縣鄰撫饒二郡前臨三臺山旁列香爐仙鶴雙乳諸峯下瞰常湖九曲環繞城郭唐宋以來名賢踵出迄前明舒公芬陳

進賢縣志

卷三

公所

六

戊戌補刻

公棟傅公冠

國朝傅公宏烈尤以鼎甲科各文章氣節彪炳史冊地靈人傑洵不誣已縣故無考棚乾隆戊辰向知縣德一因傅宮保府舊址改立曲水書院每歲科縣試童生羣萃於是顧厯歲既久屋舍多傾圯且人數歲增湫隘不能容當事屢籌移置他所卒不果嘉慶丙子庠生黃敬業監生黃金鐸闔族人等於書院西邊捐地一區廩生萬叔權庠生萬達權監生經權兄弟獨任其資荆建考棚棟宇翼然分列八進前後坐號計容千二百餘人庠生張文賓襄其工經始於丙子春二月竣事於冬十月費七千緡有奇其踴躍急公而爲是役也亦可

謂好義之士矣葺工之後已卯年周知州澍具文來請予志其緣起年月勒石以昭示永久周知州予昔督學浙江所取士也二十一年元撫江西時檄其攝縣事於進賢有賢聲又率紳士成此事是以元于公案中批此事曰紳士尙義官亦得民心是以成此善舉均堪嘉獎蓋知其必能葺工也 太子少保兵部尚書都察院右都御史總督兩廣前江西巡撫揚州阮元撰記江西南昌府義寧州前署進賢縣事錢塘周澍敬書江西南昌府進賢縣知縣宛平鈕士元勒石

進賢縣志

卷三

公所

五

戊戌補刻

南昌道在縣治西仁行坊永樂間知縣李思中併三皇廟醫學爲之規制勝他署後爲兩臺駐節所明末燬於兵

國朝康熙三年知縣聶當世捐造廳事後堂二重儀門二門廊

房庖廡悉如制

聶志
今廢 羅志

當世自撰修建南昌道館記康熙三年歲在閏逢執徐而子治之南昌道落成因故址而構之從舊貫也一日卽察院云客有問余者曰是役也亦勞矣哉烏在其不可緩乎余曰不可緩進近承省轄其衢爲四通五達憲節每於此留芟棠焉不則監司暨郡州縣牧率假道至前此二司及府館蓋不啻三四設而後俱蕩爲榛莽也上臺重客過臨勢僦民舍爲館具民則不願又體統不肅昔晉以隸人之垣羸諸侯子產猶有辭矧末員之無以共命且拂民意也屬在守土者何是誠

不可緩容曰進固赤窳瓦礫猶在目飛鴻未全集也此不費之費安出乎余曰是則早計及此矣自予止車時此羸者氓賦役之不登獄訟之未盡哀止黃鳥碩鼠交訐乎國中撫綏且不暇忍以土木滋之擾乎爰殫衷區畫捐俸餘爲大事始會邑馬生以屋二重榜受直者約平其價可八十金得瓦料若干以濟工役力計日給餼不囊鼓而事集蓋義取乎節不費公帑無煩民間一銖也客又曰是則然然則前此令是邑者何以無舉乎余曰天下事惟底厥成爲難又非成爲難也慮始更難夫固有好道風雅名爲慕潔而實圖自便者固有傳舍其官收收不終日者不知勤公家之役而爲百姓建久

遠非特動之爲擾也動之而民愈安非特靜之爲安也靜之而適以滋擾也者誠得其要而理之若網在綱有條而不紊若農服田力穡乃亦有秋安上全下道無越於此而又安可至予而不任其責也夫客乃起而謝曰誠如此言遂紀其始末鏡諸石是役也爲門二各三楹爲廳爲堂各五楹爲軒爲室各如其楹之數爲廊爲書吏舍爲庖廡悉備具大略軒觀爽塏不減於昔云

按察分司在南昌道西社稷壇右嘉靖間知縣程光甸建

聶志

今廢

羅志

布政分司正統間建於來撫門內城隍廟右萬曆間知縣黃汝

享改建於社稷壇與按察分司並顏其堂曰紫薇署後有此君
軒聶志今廢雜志

黃汝享自撰紫薇署記鍾陵當五路衝車轍馬蹄日夜不停而東西兩門爲甚文明次之田洽又次之惟城南門稍折而僻則邑城隍廟貌在焉廟右故設布政司臨駐所車馬過者稱不便卽以之弗前歲久日就圯前令更爲鍾陵書院諸生抱文擔書過者亦絕少堂皇廊舍垣壁俱朽敗欲墮屋幾爲墟當客鱗集或御史臺按部藩臬諸侯伯郡州縣牧擊轂至則又苦無以爲館舍往往問之民間民蹙額以應計更創之費不貲時詘不可以有舉不敢以請計莫若以是司敗屋料

存十之一移置它所是空基地官爲市之城南民得其價可易土木石誦工匠費於是有居民何姓者出金四十有七兩請爲合族資食處稍備工十之三會省兌倉成縣故有水次三陽潤安諸廢倉木植磚瓦可移以相佐則又得十之二而豪民有輕犯法罪溢束矢者更令出穀贖得四十金羨則又備十之二不足則以報緩金餘者益之而工成矣于是更顏其門曰紫薇署從城西門入折而右居舊院左今亦更其顏曰觀察臺兩相翼而臨焉是署也爲門者二翼以兩廊爲堂爲廳爲軒爲室爲書吏舍爲廚爲廁具備無煩官帑無騷驛民間越三月事竣而宏廠堅淨勝它館上官重客過臨者令

亦得率諸侯馬折腰從事無兩馳不可以無記

南昌府館初建縣門左正德間知縣劉源清移縣治西聶志今

廢羅志

紫薇分署在縣治北拱極門內萬歷間知縣王亮改建聶志今

廢羅志

花園公館在縣東南四十里 徐橋公館在縣東四十里

池溪公館在縣東北三十五里即翁嶺鋪 潤陂公館在縣東

北八十里 藍田公館在縣西南二十五里 玉嶺公館在縣

西四十里聶志以上六公館今俱廢羅志

養濟院洪武間立舊在縣治西北二里外成化間知縣林貴改

進賢縣志

卷三

公所

三

烏石山西金基為之苦狹隘知縣陳延又改鄭家塘舊社學為

之即今所萬歷間知縣黃汝亨重修題曰先四民明季燬於兵

國朝康熙初年知縣聶當世重建仍舊名聶志道光二年知縣

朱楣重修咸豐七年丁巳賊燬十一年辛酉知縣星聯捐建

育嬰堂二所一在縣治前狀元坊左大巷內道光二年邑人周

仕燦捐一在縣治右少府橋西馬家巷內道光二年邑人公置

新建育嬰堂記

國家肇造一百八十餘載丕冒怙育氣煦形嫗湛恩龐鴻洋

溢方宇遠方大吏郡守縣令罔不宣

上德意撫字勤懇恤耄存孤各有攸處羣生嘒嘒咸得其所

嘉慶庚辰歲安徽涇縣朱君作令進賢訪風俗詢利病以是
邑之向無育嬰堂也深慮一物不育以爲已憂查前任縣令
周君澍捐銀五百兩邑人夏忠捐田一十五畝而建堂收育
經費不給迺謀之邑人邑人好義踴躍爭輸於是置縣署前
宅一所購縣署西少府橋側民宅一所以其金置田若干畝
建堂籌費規制咸備而猶慮縣村懸隔領報維艱窮鄉僻壤
或有遺漏不可不立長久無弊之法以善其後也時邑之羅
溪有廩膳生周廷芝者與族叔維禧設育嬰之法行之一村
其法捐穀出息有貧而不能存者生女時給一石養至三月
八月如之以三石爲率至一歲時或留自有或給他人者聽

有收撫他人初生之女爲子婦者亦贍以穀行之二十餘年
全活一百三十餘口朱君以爲善下其法於各都分租穀爲
三十六分每都選舉忠信者二人領穀就近收養歲終報其
數於縣按其多寡以爲獎勵如此本之以實心行之以實政
吾見邑之呱呱而啼啞啞而笑者無不各遂其咸若之天也
夫國家德澤恩溥鰥寡孤獨廢疾者有養旣行之以其仁按
律有生女溺死者照故殺子孫例復讐之以其義仁至義盡
蓋惠養斯民如此其詳且備也而愚民或昧利忘義自殘骨
肉是而可忍孰不可忍惟良有司以保抱攜持之意行之於
上都人士以分災恤卹之心承之於下不獨觀其覩不獨予

其子此大道之行而天下爲公之世也豈不懿哉翰林院編修兼撰文 國史館纂修 記名御史賀熙齡撰

附勸戒溺女詩十首

夏修纂

呱呱哭泣不堪聞。生死關頭片刻分。縱使心腸如鑽石。聆聲怎禁淚紛紛。若謂家貧育女難。也應無女不饑寒。如何無女貧仍甚。終日難謀飯一餐。癡人溺女望生男。誰識生男亦枉貪。爾欲生男不產女。偏教生女再而三。謾言養女必貽錢。須識荆釵當玉鈿。若果傾家因嫁女。如何無女更無田。男女誰云貴賤殊。若生淑女勝狂夫。世間多少敗家子。曾見家因女敗無。養女奚殊育子功。頽然鰥寡靠顏紅。若非不

使無情水。更有何人可救窮。萱堂之上有慈親。也是當年未溺人。爲語而今溺女者。曾思何處得來身。毒如蛇蝎惡如鴉。斷送親生命一條。爾不認他他認爾。變爲厲鬼不輕饒。莫言溺女事尋常。獲罪青天降不祥。縱使眼前無果報。暗中福澤也消亡。不做爺娘竟做冤。陰曹罪案孰能翻。斯人若欲兒孫盛。切莫狼心水一盆。